

欽定續通典



欽定續通典卷五十五

禮嘉

臣等謹按杜典述嘉禮自冠婚朝賀追尊襲爵以及鄉飲酒禮按代詳敘而于冠冕巾幘服章佩綬車旗鹵簿之制尤爲該備夫采章器服因時制宜禮經所載上古唐虞迄于三代已不必其沿襲秦漢而後代有改更創制顯庸辨等威而昭上下一朝自有其法度前無待于相仿後不計其相仍惟夫祖制留遺順乎土宜而審乎時勢者實可爲子孫臣民所世守遼金元輕改衣冠變易舊制尋至衰微與後魏之更制而國弱者前後如一轍不誠爲千古之炯戒哉且夫後代定禮固有迴勝于前代者卽如開元禮載冠婚之節衣服之辨止于士而不及庶人以記有云禮不下庶人也夫禮樂不可斯須去身無禮不立上下同之所云禮不下庶人者謂升降周旋之儀寬子待庶人豈謂庶人不當定其禮哉闕而弗載是爲疎舛宋始定庶人冠婚諸制至明加詳不可謂非申明禮意補前人所未備矣舉此一端則知冠婚禮之相因尙有待于補正者況夫采章器服又寧得易國制而輕言仿古哉臣等仰承 聖訓自唐以後嘉禮以代遞編而於服章制度門仍闡繹加案以資考鏡以符杜典附存諸議之體前代冠婚之禮繁簡以時其有史志所不載者俱從其闕而据其所嘗舉行者用昭徵信焉

天子加玄服金 明

金皇帝加玄服禮告太廟或一室或徧告原廟並一獻禮用祝幣

按新唐書所載冠禮與開元禮同至德以後無所更改宋遼元史志俱不載天子冠禮

明太祖洪武三年定制先期太史院卜日工部襲冕服翰林撰祝文祝辭禮部具儀注中書省承制命某官攝太師某官攝太尉既卜日遣官告天地宗廟行一獻禮前一日內使監令陳御冠席於奉天殿正中其南設冕服案

及香案寶案侍儀司設太師太尉起居位於文樓南西向設拜位於丹墀內道設侍立位於殿上御席西東向設
盥洗位於丹陛西百官及諸執事位次如大朝儀是日質明鼓三嚴百官入皇帝服空頂幘雙童髻雙玉導絳紗
袍御輿以出侍衛警蹕奏樂如常儀皇帝升座鳴鞭報時訖通班贊各供事太師太尉先入就拜位百官皆入贊
拜樂作四拜興樂止引禮導太師先詣盥洗位搯笏盥訖出笏由西陛升內贊接引至御席西東向立引禮復
導太尉詣盥洗位盥訖訖入立於太師南侍儀奏請加玄服太尉詣皇帝前少右跪搯笏脫空頂幘以授內使內
使跪受幘興置於箱太尉進櫛設繩畢出笏興退立於西太師詣御前北向立內使監令取冕立於左太師祝曰
令月吉日始加玄服壽考維祺以介景福內使監令捧冕跪授太師太師搯笏跪授冕加冠加簪纓訖出笏興退
立於西御用監令跪奏請皇帝著袞服皇帝興著袞服訖侍儀奏請就御座內贊贊進醴樂作太師詣御前北向
立光祿卿奉酒進授太師太師搯笏受酒祝曰甘醴惟厚嘉薦令芳承天之休壽考不忘祝訖跪授內使內使跪
受酒捧進御前皇帝受祭少許啐酒訖以虛盞授內使樂止內使受盞降授太師太師受盞興以授光祿卿光祿
卿受盞退太師出笏退復位內贊導太師太尉出殿西門樂作降自西階引禮導至丹墀拜位樂止贊拜樂作太
師太尉及文武官皆四拜興樂止搯笏三舞蹈山呼出笏俯伏興樂作復四拜樂止侍儀奏禮畢皇帝興鳴鞭樂
作入宮樂止百官出皇帝改服通天冠絳紗袍拜謁太后如正旦儀擇日謁太廟興時祭同明日百官公服稱賀
賜宴謹身殿神宗萬曆三年正月帝擇日長髮命禮部具儀大學士張居正等言禮重冠婚皇上前在東宮已行冠禮三加彌尊執爵而幣鉅禮既成可略其細不必命部臣擬議第先期至奉先殿安孝恩神霄殿
以長髮告禮畢詣兩宮皇太后行五拜三叩頭禮隨御乾清宮受賀帝是之遂著為令歸有光論曰儀禮有士冠禮無天子諸侯冠禮非逸也記曰無大夫冠禮而有其昏禮古者五十而後爵何大夫冠禮之有公侯之有冠禮
夏之末造也天子之元子猶士也天下無生而貴者也繼世以立諸侯象賢也明天子諸侯大夫之無冠禮也冠
皆將責為人子弟為人臣為人少無禮故冠必有主人孤子則父兄戒宿蓋父兄以成人之禮責子弟也天

子爲元子之時以士禮冠所謂有父在則禮然也已率宗統君臨天下將又貴之爲人子爲人弟爲人臣爲人少之禮乎家語稱孔子答孟懿子之問吾取焉曰古者王世子雖幼其卽位則尊爲人君人君治成人之事者何冠孔子之遺言也益以祝雍頌公冠之篇則誣矣公冠曰公冠自爲主迎賓揖升自阼立於席旣禮降自阼襲之以三獻之禮無介無樂其酬幣朱錦采四馬其慶也天子擬冠何也此非孔氏之言也公冠又曰公冠四加玄冕左傳季武子曰臣爲人少之禮也且禮自上達而曰天子擬冠何也此非孔氏之言也公冠又曰公冠四加玄冕左傳季武子曰君冠必以櫛享之禮行之以金石之樂節之以先君之祧處之玉藻曰始冠緇布冠自諸侯下達冠而敝之可也玄冠朱組纓天子之冠也緇布冠絳綬諸侯之冠也蓋發爲天子諸侯士庶之別而不知先王制冠禮之義所以同之於士庶者也

皇太子冠皇子皇孫附 宋 明

宋皇太子冠儀嘗行於大中祥符之八年徽宗親製冠禮沿革十一卷命禮儀局倣以編次其儀前期奏告天地宗廟社稷諸陵宮觀殿中監帥尙舍張設垂拱文德殿門之內設香案殿下螭陛間又爲房於東朵殿大晟展宮架樂於橫街南太常設太子冠席東階上東宮官位於後設褥位陳服於席南東領北上遠遊冠簪導袞冕簪導同箱在服南設盥洗阼階東轡在洗西實巾一加勺霽光祿設醴席西階上南面實側尊在席南又設饌於席加霽執事者並公服立盥洗酒饌之所九旒冕遠遊冠折上巾各一匱奉禮郎三人執以待於東階之東西面北上設典儀位於宮架東北贊者二人在南西向禮直官通事舍人太常博士引太子詣朵殿東房皇帝乘輦駐垂拱殿百官起居如月朔視朝儀左輔版奏中嚴內外符寶郎奉寶先出左輔奏外辦皇帝服通天冠絳紗袍詣文德殿簾捲大樂正令撞黃鐘之鐘右五鐘皆應殿上鳴鞭皇帝出西閣乘輦協律郎俛伏跪舉麾興工鼓祝奏乾安之樂殿上扇合禮直官太常博士引禮儀使導皇帝出降輦卽座簾捲扇開鞭鳴樂止爐煙升符寶郎奉寶陳於御座左右禮直官通事舍人太常博士引掌冠贊冠者入門肅安之樂作至位樂止典儀曰再拜在位

者皆再拜左輔詣御座前承制降東階詣掌冠者前西向稱有制典儀贊在位官再拜訖宣制曰皇太子冠命卿等行禮掌冠贊冠者再拜訖文臣侍從官武臣節度使以上升殿東西立應行禮官詣東階下立東宮官入詣太子東房次禮直官等引太子內侍二人夾侍東宮官後從欽安之樂作卽席西向坐樂止引掌冠贊冠者以次詣盥洗所樂作搢笏盟祝訖出笏升樂止執折上巾者升掌冠者降一等受之右執項左執前進皇太子席前北向立祝曰咨爾元子肇冠於昨筮日擇賓德成禮具於萬斯年承天之祐乃跪冠順安之樂作掌冠者興席南北面立後準此贊冠者進席前北面跪正冠興立於掌冠者之後太子興內侍跪進服服訖樂止掌冠者揖太子復坐禮直官等引掌冠者降詣盥洗如上儀贊冠者進席前北向跪脫折上巾置於匱興內侍跪受興置於席執遠遊冠者升掌冠者降二等受之右執項左執前進太子席前北向立祝曰爰卽令辰申加玄服崇學以讓三善皆得副予一人受天百福乃跪冠懿安之樂作掌冠者興贊冠者進跪簪結紱興太子興內侍跪進服服訖樂止掌冠者揖太子復坐降詣盥洗及贊冠者跪脫遠遊冠並如上儀執袞冕者升掌冠者降三等受之右執項左執前進太子席前北向立祝曰三加彌尊國本以正無疆惟休有室大競懋昭厥德保茲永命乃跪冠成安之樂作掌冠者興贊冠者如上儀跪簪結紱內侍進服服訖樂止禮直官等引太子降自東階樂作由西階升卽醴席南向坐樂止又引掌冠者詣盥洗樂作盟祝訖升西階樂止贊冠者跪取爵內侍注酒掌冠者受爵跪進太子席前北向立祝曰旨酒嘉薦有飴其香拜受祭之以定爾祥令德壽豈日進無疆太子搢圭跪受爵正安之樂作飲訖奠爵執圭大官令徹饌席前太子搢圭食訖樂止執圭興大官令徹饌爵禮直官等引自西階詣東房易朝服降立橫街南北向東宮官復位西向太子初行樂作三位樂止禮直官等引掌冠贊冠者詣前西向掌冠者少退字之曰始生而名

爲賓之賓既冠而字以益厥文永受保之承天之慶奉敕字某太常博士請再拜太子再拜訖搢笏舞蹈再拜奏聖躬萬福又再拜左輔承旨降自東階詣太子前西向宣曰有敕太子再拜宣敕曰事親以孝接下以仁遠佞近義祿賢使能古訓是式大猷是經宣訖太子再拜訖禮直官等引太子前俯伏跪奏稱臣雖不敏敢不祇奉奏訖興復位再拜訖引出殿門樂作出門樂止侍立官並降復位典儀曰拜贊者承傳在位者皆再拜禮儀使奏禮畢鳴鞭大樂正令撞蕤賓之鐘左五鐘皆應乾安之樂作皇帝降坐左輔奏解衆放仗在位官皆再拜退太子入內朝見皇后如宮中儀迺擇日謁太廟別廟宿齋於本宮質明服遠遊冠朱明衣乘金輅至廟改服袞冕執圭行禮羣臣稱賀皇帝賜酒三行皇子冠前期擇日奏告景靈宮太常設皇子冠席文德殿東階上稍北東向設褥席陳服於席南東領北上九旒冕服七梁進賢冠服折上巾公服七梁冠簪導九旒冕簪導同箱在服南設盥洗酒饌旒冕冠巾及執事者並如皇太子儀其日質明皇帝通天冠絳紗袍御文德殿皇子自東房出內侍二人夾侍王府官從恭安之樂作卽席南向坐樂止掌冠者進折上巾北向跪冠修安之樂作贊冠者進北向跪正冠皇子興內侍跪進服訖樂止掌冠者揖皇子復坐以爵跪進祝曰酒醴和旨籩豆靜嘉授爾玄服兄弟具來永言保之降福孔皆皇子搢笏跪受爵翼安之樂作飲訖大官令進饌訖再加七梁冠進安之樂作掌冠者進爵祝曰賓贊既成肴核惟旅申加厥服禮儀有序允觀厥成承天之祐皇子跪受爵輔安之樂作大官奉饌三加九旒冕翼安之樂作掌冠者進爵祝曰旨酒嘉栗甘薦令芳三加爾服眉壽無疆永承天休俾熾而昌皇子跪受爵翼安之樂作大官奉饌饌徹皇子降易朝服立橫街南北向掌冠者字之曰歲日云吉威儀孔時昭告厥字君子攸宜順爾成德永受保之奉敕字某皇子再拜舞蹈又再拜奏聖躬萬福又再拜左輔宣敕戒曰好禮樂善服儒講藝蕃我

王室友于兄弟不溢不驕唯以守之皇子再拜進前俯伏跪稱臣雖不敏敢不祇奉俯伏興復位再拜出殿上侍立官並降復位再拜放仗明日百僚詣東上閤門賀

真宗大中祥符八年十二月戊寅承天節羣臣上壽是日皇太子慶國公加冠司天言日輝珥直抱氣戊子集賢校理晏殊

上皇子冠禮
賦詠樂之

明太祖洪武元年定皇太子冠禮前期太史監卜日工部製袞冕遠遊冠折上巾服翰林院撰祝文祝辭禮部具儀注中書省承制命某官爲賓某官贊既卜日遣官祭告天地宗廟前一日內使監令陳御座香案於奉天殿設皇太子次於殿東房賓贊次於午門外贊明執事官設盥洗於東階設皇太子冠席於殿上東南南向設醴席於西階上南向張帷幄於東序內設褥席於帷中又張帷於序外御用監陳服於帷內東領北上袞服九章遠遊冠絳紗袍折上巾緇纒犀簪在服南櫛又在南司尊寶醴於側尊加勺幕設於醴席之南設玷於尊東置二爵進饌者實饌設於尊北諸執事者各立其所鼓三嚴文武官入皇帝服通天冠絳紗袍升座如常儀賓贊就位樂作四拜興樂止侍儀司跪承制降自東階詣賓前稱有敕賓贊及在位官皆跪宣制曰皇太子冠命卿等行禮皆俯伏興四拜文武侍從班俱就殿內位賓贊執事官詣東階下位東宮官及太常博士詣殿前東房導皇太子入就冠席內侍二人夾侍東宮官後從樂作卽席西南向樂止賓贊以次詣盥洗樂作搢笏盥帨訖出笏樂止升自西階執事者奉折上巾進賓降一等受之右執項左執前進太子席前北向祝畢跪冠樂作賓興席南北面立贊冠者進席前北面跪正冠興立於賓後內侍跪進服皇太子興服訖樂止賓揖皇太子復坐賓贊降詣盥洗訖贊進前跪脫折上巾置於箱興以授內侍執事者奉遠遊冠進賓降二等受之樂作進冠如前儀贊進前北向跪贊結紱興立於賓後內侍跪進服服訖樂止賓揖皇太子復坐賓贊又降詣盥洗訖贊進前跪脫遠遊冠置於箱以授內

侍執事者奉袞冕進賓降三等受之樂作進冠如前儀畢贊進前北面跪簪結紱內侍跪進服服訖樂止太常博士導皇太子降自東階樂作由西階升卽醴席南向坐樂止賓詣盥洗樂作盥訖樂止贊冠者取爵盥爵訖請司尊所酌醴授賓賓受爵跪進於皇太子祝畢皇太子搢圭跪受爵樂作飲訖奠爵執圭進饌者奉饌於前皇太子搢圭食訖執圭興樂止執事官徹爵興饌太常博士導皇太子降自西階至殿東房易朝服詣丹墀拜位北向東宮官屬各復拜位賓贊詣皇太子位稍東西向賓少進字之辭曰奉敕字某皇太子再拜跪聽宣敕復再拜興進御前跪奏曰臣不敏敢不祇承奏畢復位侍立官並降殿復位四拜禮畢皇帝興樂作還宮樂止內給事導皇太子入內殿見皇后如正旦儀百官以次出明日謁廟如時享禮又明日百官朝服詣奉天殿稱賀退易公服詣東宮稱賀錫宴憲宗成化十四年續定皇太子冠禮前期一日遣官具特牲告廟行一獻禮錦衣衛設幕次於文華殿東序鴻臚寺設節案香案冠席醴席光祿寺設盥洗司尊所內侍張帷幄陳袍服皮弁服衰服圭帶舄等物置帷中案上具翼善冠皮弁九旒冕置於東階之南案上質明皇帝御奉天殿傳制遣官持節行禮皇太子迎於文華殿門外樂作持節官持節入置於案退樂止禮部官導皇太子詣香案前樂作四拜樂止鴻臚寺鳴贊贊行初加冠禮內侍奉翼善冠賓降階一等受之祝曰吉月令辰乃加玄服懋敬是承永介景福樂作賓跪進冠興贊者跪正冠樂止禮部官啟易服皇太子入幄易袍服出禮部官啟復坐鳴贊贊行再加冠禮內侍奉皮弁賓降階二等受之祝曰冠禮申舉以成令德敬慎威儀惟民之式樂作內侍釋翼善冠賓跪進皮弁贊者跪正皮弁樂止禮部官啟易服皇太子入幄易皮弁服舄出禮部官啟復坐鳴贊贊行三加冠禮內侍奉冕旒賓降階三等受之祝曰章服咸加飭敬有虔永固皇圖於千萬年樂作內侍釋皮弁冠賓跪進冕旒贊者跪簪結紱樂止禮部官啟

易服皇太子入幄易衰服出禮部官啟復坐鳴贊贊行醺禮皇太子詣醺席樂作卽坐樂止光祿寺官舉醺案樂作贊酌醺授賓賓執爵詣席前立樂止祝曰旨酒孔馨嘉薦再芳受天之福萬世其昌賓跪進爵皇太子搢圭受爵置於案教坊司作樂奏喜千春之曲次啟進酒皇太子舉爵飲訖奠爵於案樂止光祿寺官進饌樂作至案樂止饌訖出圭徹案賓贊復位鳴贊贊受敕戒皇太子降階樂作至拜位樂止宣敕戒官詣皇太子前稍東西向曰有制皇太子跪宣敕戒曰孝事君親友於兄弟親賢愛民居仁由義毋怠毋驕茂隆萬世樂作四拜興樂止持節官捧出節樂作皇太子送節至殿門外還東序內侍導還宮樂止賓贊等官持節復命餘如舊儀是日皇太子詣皇太后皇帝皇后前謝俱行五拜三叩頭禮用樂又明會典載當日皇太子具冕服謁祭奉明日皇帝及皇太子受羣臣賀如儀神宗萬歷中禮部尙書馮琦言舊制皇太子冠設冠席禮席於文華殿內今文華殿爲皇帝臨御遣官之地則皇太子冠席禮席應移於殿東序又親王冠舊設席於皇極門之東廡今皇太子移席於殿東序則親王應移席於殿西序從之皇子冠禮初加進網巾祝詞曰茲惟吉日冠以成人克敦孝友福祿來臻再加進翼善冠祝詞曰冠禮斯舉實由成德敬慎威儀維民之則三加進衰冕祝詞曰冠至三加命服用章敬神事上永固藩邦酌醺祝曰旨酒嘉薦載芬載芳受茲介福百世其昌敕戒詞曰孝於君親友於兄弟親賢愛民率由禮儀毋溢毋驕永保富貴其陳設執事及傳制謁謝並如皇太子儀舊禮皇太子冠之明日百官稱賀畢詣王府行禮憲宗成化二十三年皇太子冠之次日各詣奉天門東廡序立百官常拜服四成祖永樂中命皇太子嫡長子爲皇太孫冠於華蓋殿其儀與皇太子同

士大夫冠宋明

宋品官冠子儀將冠主人諏日擇賓告於廟廟戒賓而宿之質明執事者設洗於東階東南陳服於房東領北上平冕金鍍鈎石稜角簪素羅素裙蔽膝白綬中單緋白羅大帶金鍍銅華帶緋羅履襪二梁冠朝服金鍍銀稜角

簪銀立筆緋羅大袖白紗中單皁襪白羅方心曲領緋羅蔽膝緋白羅大帶銀褐綬勒帛金鍍銅束帶佩方膝練
鵲錦綾青絲網鑰石環折上巾公服巾總二梁冠平冕笄組紱實於篚平冕二梁冠折上巾各一箱執以待於西
隅南面東上主人公服立東階下西面兄弟各服其服立洗東西北上將冠者立房中南面賓贊立外門之外
設主人位於東階上西面賓贊位於西階上東面主人揖賓升就位贊冠者盥升立於房中設冠位於主人東北
西面將冠者出房南面贊冠者奠巾總於席南端還卽席坐設巾總賓降主人從降賓既盥揖遜升主人復初位
賓卽冠者席前跪正巾興降西階一等執折上巾者升授賓賓右手執項左手執前進揖冠者席前東向立祝曰
粵惟初冠者禮之稱正爾容體順爾辭令盡革童心永膺大慶乃跪冠興復位贊冠者跪正折上巾冠者興賓揖
冠者適房服折上巾服出房南面立賓主俱興賓揖冠者卽席坐贊冠者跪脫折上巾設笄賓降主人從降賓既盥揖
遜升卽冠者席前跪正巾興降西階二等執二梁冠者升授賓賓右手執項左手執前進冠者席前東向立祝曰
載契載龜載加爾服爾既順序毋曰欲速自天申之申以百福乃跪冠興復位贊冠者結紱冠者興賓揖冠者適
房服二梁冠服出房南面立賓主俱興賓揖冠者卽席坐贊冠者跪脫二梁冠設笄賓降主人從降賓既盥揖遜升賓
卽冠者席前跪正巾興降西階三等執平冕者升東面授賓賓右手執項左手執前進冠者席前東向立祝曰授
時之吉迎天之休抗以高明掖其進修三加彌尊百祿是邁乃跪冠興復位贊冠者結紱冠者興賓揖冠者適房
服平冕服出房南面立賓主俱興執事者徹折上巾二梁冠席於房布席西階上南面設酒饌如常儀贊冠者以酒
注於爵賓揖冠者卽席南面立賓受爵進席前北向立祝曰旨酒既嘉載肴斯阜既曰克家亦惟繼祖孝友慈祥
受天之祐冠者席西拜受爵賓答拜贊冠者薦饌冠者卽座飲食訖降席再拜賓答拜易服拜父父爲起入拜母

母爲起賓降當西序東面立主人降當東序西面立冠者出立於西階東南面賓少進字之曰卜筮云吉禮儀孔

明爰字爾德嘉爾有成字曰伯某甫仲叔季惟其所當冠者曰某雖不敏敢不祇奉賓出主人請禮從者賓辭主人固請

賓乃就次如別儀冠者廟見及見諸父諸兄姑姊如常儀冠訖主人釋服改席揖賓及贊冠者卽席衆賓皆興執

事者奉幣酬賓會訖賓主俱興主人再拜賓答拜賓出主人送於門外司馬光曰古者二十而冠將責爲人子爲

禮不可不重也近世人情輕薄生子猶飲乳已加巾帽有官者或爲製公服而弄之過十歲猶總角者鮮矣彼貴

以四者之行豈能知之故往往自幼至長愚昧如一由不知成人之道也古者惟稱二十而冠然世俗之敝不可

粹變若敦厚好古之君子俟其子年十五以上能通孝經論語屬知禮義然後冠之斯爲美矣又家禮載嫡子三

加皆視而冠又視而酌又視而字庶子三加既加然後酌而視之又視而字其卽席而冠也嫡子西面庶子南面

明太祖洪武元年定品官冠禮之制始加緇布冠再加進賢冠三加爵弁其儀前期擇日主者告於家廟乃筮賓

前二日戒賓及贊冠者明日設次於大門外之右南向至日夙興設洗於阼階東南東西當東霽六品以下當東

榮南北以堂深疊水在洗東加勺霽篚在洗西南肆寶巾一於篚加霽設席於東房西牖下陳服於席東領北上

莞筵四藻席四在南側尊罍醴在服北加勺霽設坫在尊北四品以下設篚無坫饌陳於坫北設洗於東房近北

疊在洗西篚在洗東北肆寶以巾贊明賓贊至門外掌次者引之次賓贊公服諸行事者各服其服就位冠各一

笏各一人執之侍於西階之西東面北上設主席於阼階上西面設賓席於西階東面冠者席於主者東北西面

主者公服立於阼階下當序西面諸親公服立於疊洗東南西面北上尊者在別室儻者公服立於門內道東北

面冠者雙童髻空頂幘雙玉導綵褶錦紳烏皮履六品以下導不以玉立於房中南面主者贊冠者公服立於房

內戶東西面賓及贊冠者出次立於門西東面北上儻者進受命出立門東西面曰敢請事賓曰某子有嘉禮命

某執事儻者入告主者迎賓於大門外之東西面再拜賓答拜主者揖贊冠者報揖又揖賓賓報揖主者入賓贊

次入及內門至階主者請陞賓三辭乃陞主者自阼階立於席東西向賓自西階立於席西東向賓贊冠者及庭盟於洗陞自西階入於東房立於主贊冠者之南西面主贊冠者導冠者立於房外之西南面賓贊冠者取纁櫛簪跪奠於筵南端退立於席北少東西面賓揖冠者冠者進升席西向坐賓贊冠者進筵前東面跪脫雙童髻櫛畢設纁興復位立賓降至纁洗盥訖詣西階主者立於席後西面賓立於西階上東面纁布冠者升賓降一等受之右執項左執前進冠者筵前東向立祝用士禮祝詞祝畢跪冠興復位賓贊冠者進筵前東面跪結纁興復位冠者興賓揖之適房賓主皆坐冠者衣青衣素裳出戶西南面立賓主俱興賓揖冠者冠者進升席西向坐賓贊冠者跪脫纁布冠櫛畢設纁賓進進賢冠立祝如初加禮祝畢跪冠興復位賓贊冠者跪設簪結纁興復位冠者適房易絳紗服出升席賓贊冠者跪脫進賢冠櫛畢設纁賓進爵弁立祝如再加禮賓贊冠者設簪結纁如前冠者適房著爵弁之服出主贊冠者徹纁櫛簪箱及筵入於房又設筵於室戶西南向冠者出房戶西南面立主贊洗解於房酌醴出南面立賓揖冠者就筵西南面立受醴進冠者筵前北面立祝畢冠者拜受解賓復西階上答拜執饌者進饌於筵冠者左執解右執脯祭於籩豆間贊者取肺一以授冠者奠解於薦西以祭冠者坐取解祭醴奠解再拜賓答拜冠者執解興賓主俱坐冠者升筵跪奠解於薦東興進北面跪取脯降自西階入見母進奠脯於席前退再拜出母不在則使人受脯於西階下初冠者入見母賓主俱興賓降當西序東面立主者降東序西面立冠者出立於西階東南面賓少進字之辭同士禮冠者再拜跪曰某不敏夙夜祗承賓出主者送於內門外西向請禮從者賓就次主者入初賓出冠者東面見諸親諸親拜之冠者答拜冠者西向拜賓贊賓贊亦答拜見諸尊於別室亦如之賓主既釋服入醴席一獻訖賓與衆賓出次立於門東西面主者出揖賓賓報揖主者

先入賓及衆賓從之至階賓立於西階上主者立於東階上衆賓立西階下主者授幣饌於賓饌復位還阼階上北面拜送賓饌降自西階主者送賓於大門外西面再拜而入孤子則諸父諸兄戒賓冠之日主者紛而迎賓冠於阼階下其儀亦如之明日廟見冠者朝服入廟南門中庭道西北面再拜出

庶人冠 宋 明

臣等謹按古冠禮之存者唯士禮後世皆推而用之故杜佑作禮典緣代厯敘所載甚詳獨無庶人冠禮至宋政和始定其制有明之初詔定冠禮自天子以至於庶人纖悉備具雖時俗鮮有行之者然載之禮官存爲典故亦一代之制也爰列載於左

宋庶人子冠儀將冠主人諏日擇賓告於廟爲位於廳事南面主人北面再拜乃告曰某子某年若干矣卜以某甲子冠吉乃速賓某以始卒冠事庶幾臨之謹告前期主人戒賓曰某日將冠於子某首願吾子蒞之賓許諾其日夙興張帷爲房於廳事之東陳服其中東領北上酒饌在服北帽一折上巾一陳於西階之西爲賓主位如常儀爲冠者席於主人東少北西向將冠者待於房主人迎賓入冠者出主人曰敢勞吾子賓揖將冠者卽席坐執帽者升賓降受之進冠者席前東向立祝曰令月吉日始加首服棄爾幼志茂爾成德俾壽而臧以介多福乃跪加帽興復位賓揖冠者適房易服出卽冠席復坐賓跪脫帽執折上巾者升賓降受之進冠者席前東向立祝曰吉月令辰申加爾服欽爾威儀柔嘉維則壽考不忘以終厥德乃跪冠興復位賓揖冠者適房執事者徹冠席爲醴席於西階南向賓揖冠者卽醴席西向立賓受醴進席前北向立祝曰爾酒既醑爾肴既旅拜受祭之自求多祐冠者席西拜受賓答拜執事者薦饌冠者坐飲食訖再拜賓答拜冠者興離席立於東階之西南向賓少進字

之曰爾服既在爾儀既備兄弟偕止爰告爾宇永保受之令德是似冠者拜賓答拜冠者廟見如常儀拜父母諸父羣從之尊者主人饗賓賓出主人送於門外

案宋政和五禮新義庶人冠二加又考宋史與服者皆載庶人冠禮初加緇布冠深衣大帶納履再加帽子早衫革帶繫腰三加纁

頭公服革帶納靴則是三加也與政和禮互異或亦因時改定姑備誌之

明制庶人冠禮凡男子年十五至二十皆可冠將冠筮日筮賓戒賓俱如品官儀是日夙興張幄爲房於廳事東皆盛服設盟於阼階下東南陳服於房中西牖下席二在南酒在服北次幘頭巾帽各盛以盤三人捧之立於堂下西階之西南向東上主人立於阼階下諸親立於盟東賓者立於門外以俟賓冠者雙紒袍勒帛素履待於房賓至主人出迎揖而入坐定冠者出於房執事者請行事賓之贊者取櫛總篋幘頭置於席南賓揖冠者卽席西向坐贊者爲之櫛合紒施總加幘頭賓降主亦降立於阼階下賓盟主人揖讓升自西階復位執事者進巾賓降一等受之詣冠者席前東向祝詞同品官祝訖跪著巾興復位冠者興賓揖之入房易服深衣大帶出就冠席賓盥如初執事者進帽賓降二等受之進祝跪冠訖興復位揖冠者入房易服襴衫要帶出就冠席賓盥如初執事者進幘頭賓降三等受之進祝跪冠訖興復位揖冠者入房易公服出執事者徹冠席設醴席於西階南向贊者酌醴出房立於冠者之南賓揖冠者卽席西向立賓受醴詣席前北面祝冠者拜受賓答拜執事者進饌冠者卽席坐飲食訖再拜賓答拜冠者離席立於西階之東南向賓宇之如品官祝冠者拜賓答拜冠者拜父母父母爲之起拜諸父之尊者遂出見鄉先生及父之執友先生執友皆答拜賓退主人請禮賓賓辭固請乃入設酒饌賓退主人酬賓贊有以幣禮畢主人以冠者見於祠堂再拜出

臣等謹按杜典女笄祇載周制今考唐以後各正史及六典會要諸書唯宋則獨有公主笄禮此外無聞焉他如各代服飾之制有未嫁已嫁之分者與周制許嫁笄而字之意相符亦并載之

宋制公主笄禮年十五雖未議下嫁亦笄笄之日設香案於殿庭設冠席於東房坐東向西設醴席於西階上坐西向東設席位於冠席南西向其裙背大袖長裙褕翟之衣各設於櫺冠笄冠朵九翟四鳳冠各置於盤蒙以帕首飾隨之陳於服櫺之南執事者三人掌之櫺總置於東房內執事宮嬪盛服旁立俟樂作奏請皇帝升御座樂止提舉官奏曰公主行笄禮樂作贊者引公主入東房次行尊者爲之總髻畢出卽席西向坐次引掌冠者東房西向立執事奉冠笄以進掌冠者進前一步受之進公主席前北向立樂止祝曰令月吉日始加元服棄爾幼志順爾成德壽考厥鴻以介景福祝畢樂作東向冠之冠畢席南北向立贊冠者爲之正冠施首飾畢揖公主適房樂止執事者奉裙背入服畢樂作公主就醴席掌冠者揖公主坐贊冠者執酒器執事者酌酒授於掌冠者執酒北向立樂止祝曰酒醴和旨籩豆靜嘉授爾玄服兄弟具來與國同休降福孔皆祝畢樂作進酒公主飲畢贊冠者受酒器執事者奉饌食訖徹饌復引公主至冠席坐樂止贊冠者至席前贊冠者脫冠置於槃執事者徹去樂作執事者奉冠以進掌冠者進前二步受之進公主席前北向立樂止祝曰吉日令辰乃中爾服飾以威儀淑謹爾德眉壽永年享受遐福祝畢樂作東向冠之冠畢席南北向立贊冠者爲之正冠施首飾畢揖公主適房樂止執事者奉大袖長裙入服畢樂作公主至醴席掌冠者揖公主坐贊冠者執酒器執事者酌酒授於掌冠者執酒北向立樂止祝曰賓贊既成穀核唯旅申加爾服禮儀有序允觀爾成承天之祐祝畢樂作進酒公主飲畢贊冠者受酒器執事者奉饌食訖徹畢復引公主至冠席坐樂作贊冠者至席前贊冠者脫冠置於槃執事者徹去樂

作執事者奉九疊四鳳冠以進掌冠者進前三步受之進公主席前向北而立樂止祝曰以歲之吉以月之令三加爾服保茲永命以終厥德受天之慶祝畢樂作東向冠之冠畢席南北向立贊冠者爲之正冠施首飾畢揖公主適房樂止執事者奉褕翟之衣入服畢樂作公主至醴席掌冠者揖公主坐贊冠者執酒器執事者酌酒授於掌冠者執酒北向立樂止祝曰旨酒嘉薦有饒其香咸加爾朋眉壽無疆永承天休俾熾而昌祝畢樂作進酒公主飲畢贊冠者受酒器執事者奉饌食訖徹饌復引公主至席位立樂止掌冠詣前相對致辭曰歲日具吉威儀孔時昭告厥宇令德攸宜表爾淑美永保受之可字曰某祝訖樂作掌冠者退引公主至君父之前樂止再拜起居謝恩再拜少俟提舉進御坐前承旨訖公主再拜提舉乃宣訓詞曰事親以孝接下以慈和柔正順恭儉謙儀不溢不驕毋說毋欺古訓是式爾其守之宣訖公主再拜前奏曰兒雖不敏敢不祗承歸位再拜見后母之禮如之禮畢公主復坐皇后稱賀次妃嬪稱賀次掌冠贊冠者謝恩次提舉衆內臣稱賀其餘班次稱賀並依常式禮畢樂作駕興樂止其士庶之家女子在室者止用冠子背子婦人則假髻大衣長裙

明制士庶之家女子在室者作三小髻金釵珠頭髻窄袖背子婦人則用禮服

欽定續通典卷五十五終